

2

T 5463 / 2732

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

抱犢山房集卷四

梁谿嵇永仁留山著

雜詩

葭秋堂舊刻

夜泛西湖同王于一遲翁山不至

日暮歌船歇澄流杳若空
倒峰湖氣上孤櫂月明
中聽曲憐司馬題詩憶遠公
鄂王墳畔樹一夜起

秋風

春日上韜光次香山原韻

竹路循危磴神仙此是家
樹藏新乳燕徑有未開

哈佛大學漢和
圖書館珍藏印

花池上留苔碣籬根出笋芽暫因僧借憩還試早春茶

少年行

年少嫻弓矢從戎久不歸一朝返故里夾道生光輝
馬勒裝金軸魚腸挂鐵衣還看舊相識白首尚寒微

渡錢塘

清曉上江船江空細雨懸落潮沙氣暖擊楫鼓聲連
鳥雀衝林起魚蝦出網鮮萬峰纔透色入望忽

雲煙

越女

越女習勤苦家家盡飼蠶攜筐來道左采葉過城南
朝露常多畏春風獨抱慚趙王殊不識妾意比澄潭

石門

落日石門近離懷苦未安人煙爭入浦夕鳥倦啼寒
歷歷吳江盡悠悠歲序闌不知霜月下猶作故鄉看

曹秋嶽司農倦圃

愛客司農性花開不閉關構亭秋水曲把酒夕陽
間人事無心絕嘯歌恒自閒南湖有鷗鳥應識謝
東山

家爾遐兄招過嚴陵

一自之官去翻令會面疎紆迴千里夢驚喜數行
書釣渚空啼鳥青溪淺漾魚憑思好風景行李漫
躊躕

春日出睦州城遊北高峯寺

淺瀨晝鳴榔春風觸緒長雲中連塢舍山半壓城
牆野火明樵路宵鐘下佛堂釣臺何所見煙月晚
蒼蒼

富春江

春寒三月盡風雨富春江一線分天影千峰赴海
幢重雲飛瀑布巨浪撼蓬窗髣髴精靈過歸心逐
此降

送徐子能歸芝山

作客爾先歸還家霜雪飛病中搔短髮歲晚惜斜

暉想到梅花日應開處士扉故鄉有耆舊寂寞尚
堪依

吳江夜發

忽覺夜風至開船夢暗驚漁燈猶未滅江月正初
生越樹崇朝色吳門昨夜情相憐遊子意過雁寂
無聲

寄家放庵兄

達夫真好學遲暮乃知名莫以戶庭累重牽婚嫁
情問年將五十讀易曉生平有子如徇外買田須

勸耕

涼谷

著書常早起春日隱蒿萊山氣不可觸柴門猶未
開落花摧細雨啼鳥戀空臺且莫斂懷抱餘寒縱
酒盃

曉發燕子磯

風雨亂雞鳴披衣正五更危磯吞水面疾櫓裂江
聲塞雁一惆悵沙鷗相送行明時羞獻賦誰與念
生平

野火

薄暮微煙起山家辨火光夜珠時上下神館暗蒼黃
黃谷口停樵客溪邊掩夕陽王孫莫歎息春草未
曾芳

虞山省楊子常表伯

鄉居三十里城郭不相聞園內馴禽鳥門前足水
雲青尊邀入夜白髮喜談文若問謀生事春田草
未耘

秋夜

虛堂復何事入夜但聞鐘送客還茆屋攜琴就古
松清陰生暗壑涼月上高峰坐覺林香滿巖花開
幾重

送顧見山河道赴都門

畫舫出雲間閭亭暫取閒離家前夜月對酒故鄉
山赴闕非懷祿乘時欲濟艱長征遙計日秋水正
潺潺

秋日再過嚴陵

作客易悲歡秋天又早寒雲山常寂寞世道自波

瀾暫住梁鴻里重來嚴子灘風霜羈旅色不敢鏡
中看

平望

一氣自蒼瀨難分吳越天鳥隨楓葉下帆帶夕陽
懸古驛深苔碣橫橋鎖暮煙兵戈猶未歇飲馬太
湖邊

早

赤日無雲氣長風四野清祇求涼雨過不敢計秋
成簷燕侵晨出山蟬競夜鳴那堪郊外望處處枯

棹聲

休休庵同梵林暨師巢舍弟

月明須放飲難遣是殘冬有弟知艱苦攜僧共懶
慵燈昏長對佛霜冷不聞鐘遙憶砧聲裏寒衣授
幾重

髯僧述雲臺名勝

戶牖生遐矚登臨說過來兩峰低日觀諸島拜雲
臺畫沐魚龍氣宵聞鸞鶴哀老僧親見後三度碧
桃開

湖心寺

湖水浮千頃春流沒半篙石屏寒漲汐煙樹障波
濤寺有耕田利門無送客勞山厨薄滋味四序翦
溪毛

送何大左車還白下

時留浙署

湖水沈沈綠煙花泊小船到來春繫馬歸去暮聞
蟬親老難爲客心知恨各天也應常送別怕向酒
樓前

其二

迴憶家園勝山陰道上多扁舟離越館明月滿吳
歌舊事尋桃葉新詩詠芰荷煙雲如落紙換得右
軍鷺

其三

九龍峰影下遠遠一帆張敝里當溪岸東城有草
堂聽泉還獨過看竹更誰將川陸雲陽便休嗟江
路長

其四

白髮江南住年年菽水虛歸囊懸負米截竹慣盛

魚君去麥秋節途逢轅犢車平安賴傳達堂上病
將除

其五

年少應徐輩奇才吐夏雲柯亭知者少鹽齏歎爲
羣且重許身節毋求先達聞柴門秋爽下散帙倚
斜曛

送唐祖命入閩

煙雨武陵秋相逢上酒樓征車無滯跡明日更行
舟星出三山沒雲歸五嶺浮羨君垂白髮物外任

遨遊

王于一自崇川至又送其過江上

山陽同避亂孤棹過崇川家累移湖上詩窮自海
邊空城千隊馬落日一聲蟬君問江東路曾留幾
井煙

竹外

驚看盈尺筍翠影到柴門出土雲霄氣瀰天風雨
痕鳥聲如隔澗人跡不成村賴有田間叟乘閒共
把樽

東園訪張三牧公

延陵船未泊到即叩東園野客不知路蒼頭方候
門他鄉家已破老母齒尤尊艱苦良朋意爲言雞
黍存

琵琶女

養兒不識字教女學琵琶一撥勝越豔再彈過吳
娃日供三斛黛夜買千錢花不願入宮掖願從豪
富家

京口訊潘江如

亂後家園在天留處士貧入城看敗瓦居巷寂無
鄰水活宜栽柳山低好負薪齊門難鼓瑟歸老著
書人

泊舟太湖是日即解纜

預儲今日酒暫歇雨中船湖氣涵煙草人家傍水
田石衝垂釣路鳥沒挂帆天聞道越江好此時應
采蓮

聞梅杓司歸敬亭

客自白門過知君返故廬鄉關兵火後山色夏秋

初雞犬舊司宅田園重買鋤是非江海上避患學
潛魚

五更

五更喧市舶伐鼓祀靈祠水急星如掣帆開樹欲
隨塔光垂幕簷漁唱起漣漪獨有滄洲思白鷗知
不知

晴

閨門多積翠燕雀喜新晴四月榴花滿一天秧水
生溪光圍破寺草色露東城縱有樵人過牛羊不

受驚

涇溪暮泛至湖口

放船溪水曲引纜問田夫返照上簷瓦秋聲入蟪
蛄潮來袁術墓月動范光湖誰爲捕魚往因人呼
釣徒

雪霽放舟答雲子見別詩

蹤跡悲浮梗雲山倦采薇離亭一樽酒客路兩重
衣雁字霜中斷梅花道上稀淮南風雪後我獨挂
帆歸

東臯主人留榻

草堂懸木榻燈照不眠人
獨樹聽殘雨寒塘斷比
隣靜知交道薄轉覺酒徒真
明日江東路波濤愁
問津

有贈

白髮牆東叟天明獨灌花
豆藤牽爨室苔蘚上漁
槎月落留殘魄雲晴變早霞
此時逢客到尤喜斷
鳴蛙

談長益留楚中未還

江聲寒白日環抱野人扉
一自出門去空巢有燕
歸依槎潭影動投館夕陽微
不有登臨者天涯誰
息機

拳石臺

天青入孤望怪石臥層臺
樹密朝無雨溪深夜挾
雷艤船驚白鷺掃地落黃梅
遙覺峰巒到東南霽
色開

石塔院哭潛江劉學士

著書期後世夫子竟先祖
可嘆黃花節傷心白社

孤人間空手澤地下辨歸途蕭寺秋風裏門生泣
向隅

買魚

寒月明絲網攜錢買活魚雲歸雙岸出星落一潭
虛沽酒誰爲對題詩只贈余風波最安穩湖上可
茅居

防兵移至石塔介公過白門矣

石門猶古剎戰馬牧迴廊燕子不成壘春風何處
翔上人遊故國錫杖挂空房幾見殘僧在停鐘麥

飯香

觀獵

青草郊原外黃沙日氣蒸驕風嘶怒馬健臂力飢
鷹細柳將軍過窮崖獵士登橐駝垂野獸鞍下月
輪升

與寶月庵老僧

三載不來此老僧意尚真聽鐘無別事沽酒莫相
嗔月亂風前柳溪生雨後蘋入吳傷逆旅不信是
吳人

家巖若移居峴山

峴山新買宅兒女就桑麻薄日東隣樹寒風處士
家力田餘飲食養母惜年華莫更驅城市南方正
鼓笳

采葛

何必思公子難忘采葛情宿根在遠澤新蔓過前
楹黃鳥復來喚朱顏空後生鄰家女不解月夜獨
調箏

周二爲荷亭

醉向荷亭宿荷亭花正妍秋蟬非一處暮柳盡生
煙草藉陳蕃榻門通范蠡船主人邀更酌不敢逞
高眠

贈龔半千

江南一柴丈破笠伴孤筇邗水且浮宅鍾山無老
松挂琴聲滿壁待客黍加春買隱何年事閒圖江
上峰

野泊

野泊沙堤暮迴風荻港生鳥歸京峴樹山鑠潤州

抱朴山房集卷四
十一
城石怒潮相狎魚寒夜不驚二更難就枕江月太
分明

秋思

落葉滿秋林秋聲不可尋高樓有思婦夜起彈瑤
琴越國海雲變吳江煙水深輪臺千萬里何日罷
笳音

同孫豹人泛雷塘

沽酒出城外來尋漁父家借船經夏浦帶雨看荷
花水漲蛟涎冷風香燕舞斜美人撤錦帳日暮弄

琵琶

同友人出郊外

便作揚州客寒濤不可聞有家皆逆旅出郭喜同
羣蜀井前朝蹟隋宮新鬼墳隔江烽火後移駐水
犀軍

寄張淮山吏部

遙憶釣魚臺園林向水開清風一下榻明月共銜
杯野鶴時相過閒鷗亦往來昔年此風景繫馬獨
徘徊

屏風山

寺後山光近通明一竇懸陽鳥中外景桂魄往來
圓孔雀張雲翼芙蓉列漢天蒼茫靈氣厚知與岱
宗連

登影翠臺望泰山

嶽氣撼虛空登臺自不同千峰遙枕北羣阜獨朝
果雲落碧霞殿花飛青帝宮還疑霄漢近颯颯御
天風

羊流店

風流羊太傅故里至今存日暮思三徑天空問九
原雲磬開遠嶂汶水帶荒村父老談遺事林泉細
討論

蒙陰

東蒙高在望我欲采靈芝未得江心汲先憑石火
炊名泉隨杖湧斜日下山遲且喜乘新爽春風已
過期

聞友人村居之樂

勞車何日已羨爾寄青門桑柘栽千樹漁樵住一

邨情閒能狎鳥客到即開樽人事如流水山家總
不論

青駝寺

津樹影婆娑離亭悲且歌人煙行處少山色路傍
多倦馬渴奔水征車怯上坡夕陽明滅內古寺指
青駝

半城邨

夏霧野冥冥瑯琊枕北屏迎眸沂水白迴首魯山
青老婦賣春繭貧農仗雨靈半城村市罷初地讀

碑銘

懷李青章公車北上

北闕繞燕雲春風獨憶君離憂應共切言笑孰爲
羣天路鴻音遠山丘蘭氣紛去年相送處門外駐
斜曛

宿遷

搖搖心靡定去去路將殘聲入黃河險情隨綠野
寬鳩鳴初下樹魚活未離竿待趁風帆過波濤拂
面寒

自解

入眼藤花落新詩不禁生登樓當有月聽鳥到無
聲年少難摧折情多變老成舊遊知幾處昨夢石
頭城

初秋雜詠

葡萄帶雨薦盤時事事驚心遊子悲一點螢光秋
草外露濃飛不到書帷

其二

一劍空爲道左留葛衣寒甚不經秋可憐驟雨狂

風夜浪打湖干避亂舟

其三

薄薄雲衣淡淡明一蟬向晚獨留聲池邊綠葉隨
風捲開盡蓮花秋水盈

其四

江干有警望飛援羽檄星馳馬足喧二六時辰鐘
磬杳祗林反道是桃源

其五

涼風淅淅扇窮途雁未南征少帛書昨問故人家

不遠輕帆兩日射陽湖

其六

聞鐘端不是聞笳靜裏秋聲反憶家飯罷老僧相
對坐蒲團移近鳳仙花

其七

漠漠一望渚田青禾耳叢生泛野萍自到秋來無
好日滿天欲雨亂蜻蜓

其八

散盡珠璣輾轉貧新秋早起看垂綸為言姓字同

泉石湖上閒鷗識老臣

為劉阮
仙前輩

其九

病骨逢秋影亦寒鬢眉常借水中看山僧雖樸能
供客親摘園蔬佐曉餐

其十

薜蘿繞屋佛幢清幾日纔秋絡緯鳴不是書生空
露坐代籌時事夜談兵

其十一

愁苦迎人便解詩禪窗翻覺夕陽遲秋風吹落梧

桐子小鳥銜來復上枝

其十二

煙火蕭然里巷空
人家半借甃湖中
淒涼促織喧
秋夜織得愁絲幾萬叢

抱犢山房集卷四

男曾筠謹編

抱犢山房集卷五

梁谿嵇永仁留山著

雜文

竹林集舊刻

曆解解

甘氏星經云太昊執圭治春炎帝執準治夏黃帝
執繩治四方少昊執矩治秋顓頊執權衡治冬按
圭與規同楊升庵解之謂春規圓以應仁也夏準
平以應禮也中央繩直以應信信非一定之名繩
亦非一定之器也秋矩方以應義也冬權衡輕重

以應智也或擬五器分五時冬何故獨有其二楊太史則爲之說曰冬於方爲朔於卦爲艮艮所以終萬物而始萬物也攷六壬家東甲乙青龍南丙丁朱雀中央戊己勾陳西庚辛白虎北壬癸玄武騰蛇有龜有蛇冬亦二獸再攷五運之神重爲春神曰勾芒黎爲夏神曰祝融勾龍爲中央神曰后土該爲秋神曰蓐收修與熙爲冬神曰玄冥有修有熙冬亦二官此其所以有權衡二器也歟即如易四德元亨利貞元大也亨通也利宜也貞正而

固也貞亦兼有二德揚雄作太玄擬易有罔蒙直首冥之文以配元亨利貞而冬亦兼有首冥二時其義一也宋蘇子瞻與龐安常書端居靜念人五臟皆止一而腎獨二蓋萬物之所終始生之所出死之所入也一身中四肢九竅凡兩者皆水屬兩腎兩外腎兩手兩足兩目兩鼻皆水之所升降也以蘇言驗之腎之獨有二也毋乃與前說通乎余讀書堯典禹貢每以北方爲朔方寡稱北者注萬物盡於北方蘇而復生也余因思歲序十二月中

獨十月爲陽月周禮六官中獨冬官爲司空理或
可思董仲舒曰陰居大冬積於空虛不用之地倘
亦近是乎且惟空虛爲能生物曆不曰朔晦而曰
晦朔易不曰陽陰而曰陰陽不曰生死而曰死生
不曰神鬼而曰鬼神不曰闢闔而曰闔闢生生之
謂易陽主生陰主死若曰陽陰則死而不復生矣
餘各倣是王純甫有言天地之數常止於九九則
行十則止如二九十八三九二十七自此推之直
至無窮若二十則二十三則三十皆死數向

前更推不去矣余更因其言廣之商之歸藏首坤
子曰吾得坤乾焉易說卦曰物不可窮也故受之
以未濟終焉有能即是解叅之思過半矣楊公又
云晝夜漏刻古曆百二十刻用地支數今曆百刻
用天干數嘗見元授時曆有長六十二刻短三十
八刻者今長短至六十四十爲極余憶正統末年
曆偶過六十一刻岳文肅正憂之果兆土木之禍
惟明朝大統曆較異若元曆故其嘗耳斯亦治曆
家所當知乎其論水火微言云古懸炭測景夏至

水勝故炭濕而重冬至火勝故炭燥而輕夏火旺而曰水勝水在內也冬水旺而曰火勝火在內也驗之人身夏則五臟化水冬則五臟化火夏非水在內則焦焚矣冬非火在內則凍僵矣此陰陽互藏其宅之妙也嗚呼玄矣玄矣古太史氏主天官治律與曆若楊公之曆解精融可謂無負史職矣世徒以淵博名之何耶

呂公以女許高祖

呂公飲高祖酒後曰臣相人多矣無如季幸自愛臣有息女願爲箕帚妾酒罷媪怒曰公始奇此女與貴人沛令善公求不與何妄許劉季季居常不事生產作業生產利養也作業勤本也不利養則破生產不勤本則廢作業是謂游惰游惰者生事季好酒從王媪武負貫久不償致折券棄負丈夫不能完逋累且恣嗜慾不謹爲人憐而罷之何以自立季好色多置外婦曹氏姬已爲季生子外婦

生子適庶不能正不事生產作業室家無所賴好
酒凍餒妻子不顧好色者恩愛分薄於結髮亭長
賤吏孰與令貴慎無妄許劉季呂公笑曰此豈兒
女子所知耶卒與高祖

蕭何主進

單父呂公善沛令家焉沛豪傑吏皆往賀蕭何主
進令諸大夫曰呂公令重客也辟仇來就令偕媪
與息卜居此地其人賢豪長者不賢令不重不豪
不辟仇夫囂囂者多黷官長非瀆利則請事碌碌
者不讐人人亦不讐之公去此二者以知其賢豪
且沛邑小多椎埋屠狗之人上者矜氣節不文其
次弄刀筆公不棄與爲鄰竝通喜慶戚弔之事誠
非長者不及此諸大夫來賀無虛文毋飾貌毋吝

貨財毋有禮而詐古者會財之禮有主賦斂者爲之帥何主吏當主進進以貝爲禮若大貝若牡貝若小貝貝至二百錢以上爲止至五貝爲朋百朋爲重爾諸大夫有進千錢者坐堂上其不滿千錢者坐堂下諸吏遵令無敢譁者頃之泗水亭長劉季來冠竹皮冠不與諸吏言呼謁者告之曰賀錢萬呂公大驚倒屣攝衣迎之門立談睥睨良久實不持一錢也諸客闕於堂呂公見其狀貌益重敬之引入坐上坐固留竟酒後無所誑

劉章請軍法行酒

朱虛侯章以妻呂祿女得帶劔宿衛入侍燕飲忿諸呂用事思少戢之乃前曰臣將種請以軍法行酒呂后曰有說乎對曰先王制酒禮綴淫也一獻百拜終日飲而不醉備酒禍也猶有慮焉又立司正監之紀過也史以佐之其不拜尊所者有罰軍法畏矯制擅令也咕嗶耳語者有罰軍法重不軌也舍坐遷者有罰軍法戒失伍離次也號呶者有罰軍法銜枚防誼譁也賓筵之詩曰罰出童跣以

無角之牯必不可得示罪在必罰也夫燕禮不行
懽愉之心不洽軍法不行朝廷之體不尊誥有之
剛制於酒蓋謂剛果用力以制之臣年二十氣力
差大既自制又能制人堪勝任焉后微酣許之章
拔劍來前口宣約束三令而五申之諸呂心稍餒
章歌詩侑酒氣益慷慨有亡酒者章追至殿下斬
之報后曰臣按軍法逃者殺無赦一人亡酒臣謹
如法治之矣后大驚罷宴諸呂謝罪狼顧鼠竄而
退

內史士請益公主湯沐邑

齊王肥入朝惠帝兄禮之呂后怒置鴆酒王覺陽
醉去閉齊邸不出內史士請曰王怒然有憂者何
哉王足地曰禍至矣士曰人有患病者伏枕而憂
乎抑治之王曰病而憂是益病也治之便士曰王
不策避禍憂而閉邸何以異於是王笑曰智不及
也將奈何士曰臣聞龍之爲物至難馴也頷有逆
鱗櫻者身首糜碎有豢龍氏擾之至於虺虺噬人
之物也獵者羆之跨項編須翻作蟠下角觝戲焉

此無他投其嗜慾也嗜慾寧雖極凶殘狂暴之物
能不爲人害且與人近豈惟與人近且悅而安之
凡嗜慾者皆然何足怪哉天下惟無貪者不可餌
此智者難之况婦人女子乎太后將禍王王匿處
複壁不可逃也太后将不禍王王洞開重門無虞
也王見惡太后過執家人禮失在亢王請降心從
焉降者於我抑而下之於人尊而上之也以尊太
后無名以尊帝帝仁厚不忍愚以術莫若尊魯元
公主崇其虛稱貢其實惠濟虛以實其出有名王

今沐浴朝衣冠請於長樂宮曰臣德薄才朽不能
享全齊土地敢以一郡益魯元公主湯沐邑尊公
主爲齊王太后此計行臣將戒僕夫膏車廐人秣
馬以待王旦夕就道王從其言太后心喜可之置
酒齊邸飲極樂明日遣歸國

趙美人遺書漢帝

高帝平東垣過趙趙王敖以美人獻帝幸而去之
敖逮捕吏并收美人美人弟兼因辟陽侯求呂后
后妒不言美人上書曰妾生長邯鄲薄有顏色父
母教以郢曲之歌陽阿之舞既工而嫺趙王求之
將備後宮會且進御於上陛下不遺棄葑菲邀顧
盼被恩寵妾幸也已而自知有娠妾更終身幸也
陛下既回長安趙王築外宮舍妾於內遇之恭謹
卒不聞陛下走一吏御一兩迎而致之宮中乃懼

於無辜牽制請室耳聞鈴柝目見狴犴下辱貴人
上傷恩德大臣以遠嫌而不肯告小吏以分卑而
不敢白天顏咫尺君門萬里可勝痛哉妾揣陛下
伺呂后之意旨嬖戚姬之媚順加以列屋而居者
飾粉黛弄睂首副玉珈曳綺縠日容悅於前如妾
又何足道然而妾乃婦人棄之可也帝王之血引
尚在懷胎中者何可斬也古者天子三夫人九嬪
世婦二十七人御妻八十一人妾雖不當聖意上
不能進夫人嬪婦之列次或退處御妻之末抱衾

稠賦小星分固當也陛下奈何滅枕席之恩絕牀
第之愛以爲罪人之孥一切擯斥不理妾恐宮闈
之間凡受進御之恩者不安而危而陛下寡恩薄
愛之名聞於後世矣詩曰江有汜水有時復入爲
汜也語曰心成憐白髮玄髮可以玄也妾則誰望
哉妾知不幸者三僻居窮鄉生爲醜女椎髻荆布
嫁作庶人妻糟糠偕老幸也顏色不幸也家人不
惑於俗惟紡績女紅是問異日操井臼主中饋無
非無儀幸也習歌舞不幸也季女守貞十年不字

光華外閔璞玉內堅觀者過而不睨幸也顧盼恩寵不幸也彖曰歸妹人之終始也謂歸者女之終生育者人之始象曰歸妹君子以永終知敝爲始合不正終有敝也妾以趙王進繼以趙王累豈不然乎是故心不病而傷腸不曲而結鼻不逆而酸命不脆而薄子若彌月之期毋恐終天之恨子雖產不知有母母苟活無益於子生也不如其死也存不爲有室之婦歿不爲有主之魂哀哉慟哉命絕於此謹待坼副災害以死書既成不得上越數

日始生乃爲厲王美人恚即自殺吏齎子與書以聞帝大悔令呂后母其子以妃禮葬美人於真定

圯上老人論

嘗讀漢書至圯上老人命張良進履竊疑而怪焉
以爲人情非其所屬則難抑而下之以從予所命
何者勢與分兩不在也勢在則畏而不敢分在則
強而不能其他即傲然肆然惟意之適呼而不來
麾之不去既無生殺以制其命又無予奪以榮辱
其身何苦而爲此蹇蹇者乎或曰進履之事加於
行路一介之夫必遭其詬罵雖甚盛德掉臂不顧
而已耳跪而進之何爲也不知子房蓋學本黃老

者也黃帝學於廣成子親至崆峒訪焉老聃語孔子曰去子之驕氣與多欲態色與淫志誠知降其體者然後入道虛其心者然後聞道子房其亦習之熟矣夫讀其書想見其人願得習黃老者一旦暮遇之也今有一人焉其貌異其行野其言詞倨而侮則無乃精軒轅之業行猶龍之教者歟是故偃僂罄折俛首改容奉教而惟恐後聞命而若不遑也不然違之無損於名從之無益於己豈不徒然召羞取辱也哉又有景帝之世王生老人辱廷尉張釋之結韉釋之亦跪而結焉子房猶下氣於無人之地釋之獨卑禮於廷會之時抑又何爲也以王生固善爲黃老之言者也夫子房辟穀不仕乃持老子知足之計試黃帝不死之術則其受益於老人者不更顯然乎大抵方外之教人也與君子不同方外者不辱以不堪之事則其道不尊不堅以不退之志則其教不切君子獨不然來者不拒去者不追如是焉而已

欒布論

欒布之言曰窮困不能辱身者非人也富貴不能快意者非賢也余以爲辱身易快意難辱身者人辱之快意者自快之也有不得不辱之勢范睢是也當魏齊欲置之死地折脅摺齒置廁更溺佯死而不敢言恐言之速其死耳有不可不辱之時韓信是也少年曰汝能當刺我不能出我跨下信雖弱何難戮一匹夫以殺之無益故終忍之脫使范淮嚼血肆罵觸其怒以死與韓信手刃少年於市

而逮危禍安得位至將相爵列王侯榮於當時顯稱後世報仇雪恥於轉盼間哉然而豪傑之士辱身者千百其間快意者殆無一二以卿相王侯之爵位誠不可以操券而必得也余嘗悲夫士之遭逢不偶智出人下如羊觸籬進退維谷者矣一時威權赫奕之徒既糞土爨之牛馬賤之甚而僕妾奴隸交相戲侮雖或含怒積憤忍詬匿怨裂眦切齒老死長阪廣谷之下而終不獲一洩胷中之氣可勝道哉余是以謂辱身易快意難也樂布始而

傭保繼而奴終而囚辱之已甚卒能拜都尉爲燕相封俞侯豈不赫然大丈夫乎然布當困阨死之日誠不料其及此乃一旦僥倖萬一報德滅怨以是矯語人曰快意快意夫何可爲賢也不知天下富貴之後忘棄故人恐言其情態以德爲怨者有之更且厚遇仇讐博長者名以顛倒是非者有之此皆恩怨不明者也能明恩怨者行三代之直道生則可以賢死則可以神不然布有何殊功茂德輒使燕齊之人俎豆之不祧然則後世立樂

公社者其在斯歟其在斯歟

通濟橋記

金華通遠門外距城一里為通濟橋舊址壞於兵
火修則無基建則費詘每遇霖潦暴發溪湧山高
渡者目駭耳回夔魑坐水底待人而食人多死之
或曰鬼實禍焉守憲胡公始至思所以洗民患者
獨力未易支也乃捐金倡募合僚屬紳士商販所
輸可得萬緡遂精簡廉幹經營相度伐木於龍游
鑿石於遂安遴匠鳩工築基肇址時苦春漲人力
難施公望洋而嘆俄而風翻水怒如有神物排銀

濤而驅雪浪一時水涸見底徒衆踴躍用命爲立
石墩墩成復大雨滂沱水汪洋而盈者如前其所
採買山木皆得順流直下若或航之是一涸一盈
適遭其會人心勸而天事宜也往者造橋之役誅
求大戶督責富貴苛派里夫伐傷墳樹生者不寧
死者失所以故經年不成經數年不成雖或成之
經數十年輒敗皆蓄怨積怒之所歸也豈能久哉
公獨不然輸者獎否者聽力役者給之米薪故其
成易易也方橋垂成時有老人夜聞鬼語曰工竣

矣若輩無安身所奈何應者曰俟諸來日如是啾
啾者久而始散老人心惑之次日渡者六十餘人
老人亦附舟俄觸夜來所聞倉皇登岸不敢渡是
日天氣晴風亦恬止渡未半湍激回焱風濤迅發
須臾舟如敗葉倒景蔽天渡者號哭之聲殷殷雷
砰岸人刺船往救而篙如萬石弩不可動人謂鬼
力所憑而人舟已沈沒矣觀者舌橋口張嘆息而
已因相與酬酒奠之曰使公早來安有此患它日
橋成吾儕又安復有此患乎於是樂施者甚多効

力者愈猛閱三月而告成工始知人定勝天鬼終不能爲禍也已而予用有歎也孫樵曰樵嘗爲褒城驛記恨所在長吏不肯出毫力以利民及覩滎陽公以開新江受譴豈立事者亦未易今幸胡公肯出力利民而不哀於民又樂發民馴訥與公相信不至如滎陽公喋喋教今日白其意於鄰民且喜徭役尚省得便宜舉行既不能病民亦不能爲官憂三月落成無事聞之大府與劾之有司也是均不可無記雖然橋成而記之民意也非公意也

七竹軒記

東陽署之右偏爲余授書所庭有隙地半畝種竹六竿余顏其軒曰七竹以余故也竹固樂得余爲友而增其一也然而此君之不宜於世也久矣其心空其節勁其質古其色蒼然而秀空者無物勁者自強古則守樸不競蒼然而秀則磊落自好是吾儕不可一日少即流俗不可一日多也余也其敢望乎空山之中多紛紅駭綠之品幽素者弗尚也塵埃之內有凌霄蔽日之姿軟媚者弗樂也我

所棄或爲人所取我所取或爲人所棄是故此君
幸而遇余不至鋤而去焉而又與之爲伍投分結
契歷暑踰寒彼既不孤此亦得偶其不幸而余去
也則此軒空存安保後之人有顧名思義者乎於
是作記告之曰凡入此室處者幸善遇我同類

蔬枰記

宋子抱幽憂之疾不樂仕於時退隱射陽之濱自
號耕海潛夫名其圃曰蔬枰余謂蔬者治生之細
務枰者造物之爭端盍取諸宋子曰人病無事耳
有入世之事即有避世之事避世者耦耕荷篠荷
簞之類是也余生而衰孱不任力作寤而蕤蕤寐
而魚魚一切勤苦煩毒之事弗舉於趾而累於手
者久矣然獨愛種植出也抱甕入也灌園不知其
志之劬而力之憊也余有老母春秋頗高老人健

忘余種菖蒲以益其聰老人多思慮余種萱草以
忘其憂老人氣不足余種申椒以延其年老人愛
哺孫余種棗栗以佐其飴老人厭淡薄余種葵種
薺以甘滑其味至於瓜瓠苴荼則與山妻稚子以
爲常食是亦可以終其身乎若夫人世之變幻顛
倒千百萬億固有不忍言者其形容怪誕如鬼神
其肺肝宿慘如刀劍其言語反覆牴牾如禽獸之
呶呶不可聽其朝而胼肩暮而掉臂陽敦玉帛陰
擠下石之情狀如山谷江河之險阻而洶湧此其

勢如枰然黑白紛紜勝敗倏忽角智鬪能忿爭莫
解詩曰憂心奕奕奕者局之無定者也詩人以憂
心擬之余則以鋤刈糞溉治之豈不脫然無累也
哉余曰善存諸心曾七八年偶有所感乃述其言
以爲記

與曹秋嶽先生書

桑乾風沙之內曾邀先生枉顧拳拳以生事學業
爲問誠哀家貧而憂失學也嗣後某隨大叅胡公
復過金婺偷暇讀漢書一年讀唐宋諸子又一年
王子于一更勸讀尚書於是粗辨古文家數然舉
筆臨文則又茫然矣竊歎古人學問有成類皆牧
牛耕犢樵山漁水於窮困發憤得之未見有寄人
籬下溫衣飽食而能窺文章堂奧者也某棄而之
閭里思欲究竟此道堅不出門奈老親弱弟衣食

不繼不得已復走風塵爲觀察祖公所留公稔某緣養親而出爲預備父母百年事恒馳寄菽水某感其恩遇條畫治河數策時河苦遷徙口決運梗中外惴惴觀察以策上河憲河憲上大府各嘉納報可不半年功告成某得抽身還吳因念江南文衡客歲有伯樂之顧益急圖下帷恐負知己乃還視故鄉無一枝可棲爲養親地又不得不擔簦出遊莫越中當路稍潤巾餅歸買一畝之宮率妻孥奉高堂甘旨再出餘貲俾弱弟分半耕讀某亦得

不憂饑寒則三十年以後之心思氣力皆可不用之衣食而專精畢慮於文章此某生平之榮願也某到湖上之日即謁林鐵崖先生始知先生讀書客中便期趨侍教誨以足痛未果不意先生折節先枉存我逆旅何前輩愛士急而憐才切也夫軒蓋聲施之地往往奔走貧士有同雁鷺而士之傴僂屈折於其門者仰伺奴僕意色求一登堂尚不可得豈敢望大人先生之就見哉某於今竊自幸矣幸大人先生既不我鄙棄則必以若人或有一

得可節取而造就之故不憚孜孜汲引是以聊自
壯也抑聞先生囑鐵崖先生語須勸勉嵇子讀書
至諄至切則又何相見之暫而相期之深遂相督
之嚴也某思古人學問要皆有得力親切之人如
一瓣香專歸南豐者事非一二某待今人詩文頗
嚴然亦不肯輕恕古人若時賢中大人先生有類
先秦兩漢初唐者則又不啻古人之好好之矣方
今海內名碩輒云子雲多而桓譚少某正謂子雲
未必多也不過往來稱弟子者一二虛聲侯芭耳

芭文不見於世乃以爲揚雄之書勝周易殆過諛
甚矣某不爾也某於當今鉅公詩若文顧亦曾手
追成書矣然每不自量竊欲厲掌奮膝以紹禹功
獨於先生詩文未獲全本十年之內或從一篋一
箋積累鈔錄合諸體不滿二三十首以此爲平生
憾常擬負笈躡蹻不計道里修阻從先生小胥私
乞縑緗繕寫數帙又苦魏勃無路可効掃門今幸
先生駐此則某可省夢寐之勞與風雨郵置之瘁
先生顧何惜盡傾所藏稍飫調饑使一介鯁生粗

載而歸淮水也乎伏楮待命可勝發憤

上嚴灝亭先生書

某少碌碌四方余澹心爲字留山梵林圖之越數
年秦淮樊圻謝成吳宏高岑鄒喆又續爲圖合肥
公官司寇時愛而題曰疎林茆屋步步引入山之
夢櫟公覲長安相遇白雲觀中亦有黃塵猶在面
辛苦賦留山之句又題曰樹前石背有著雙不借
循書聲而來者非他人乃櫟下生見山比部更變
爲五湖操艇之圖詩云我慕鴟夷潔期來弔五湖
自是江以南北莫不知有留山堂留山堂云然某

實無堂也年來方伯袁公廉使金公贈買山錢始得置屋溪上而四方之熟識某者仍在車塵馬足間卜之而不知其實有堂矣夫豈惟有堂且得名公大人如先生者枉存陋巷足辱蓬門使鄉人知有長者車轍某得稍賢於傭販牧豎之萬一且不至如往日尋聲覓響索某於東西南北萍水無定之鄉不亦大可幸哉某今更有望者先生之詩建幟中原吾黨詠歌已久獨先生畫不多見知先生不爲世作畫某竊擬先生畫當蒼老踈宕全是元

人其秀潤圓潔仍本宋人家數夫元畫非別有源派不過脫胎宋人化整爲散化正爲奇化刻畫爲高脫先生蓋真用此意哉間嘗攷之周時禮明樂備六藝浸淫畫從此始穆王時其臣封膜作畫厥後帝王之家設立畫苑學士公卿間以繪事應制則畫亦非尋常山人墨客小伎薄倆而已也某今請先生爲作留山堂圖其間柴門流水破壁頽楹固不足繪願先生繪其境界峭特者俾某異日短衣犢褌推鹿車載父母妻子入山當以先生一圖

爲今日九朽耳舍弟師巢亦粗學作畫特令齋縑
造門長跪以請伏惟教誨不宣

與周敷文書

去歲作書寄足下迫於跂慕誠不能已時觸境造
辭中多感慨失之亢激非所以通殷勤致繾綣也
深恐足下以鄙妄見病用是慚悼積今彌載比得
張子書來知足下意中尚不忘僕幸甚幸甚僕少
不自重好詼諧雜劇譏刺平生不當意者自知獲
罪名教復不肯劇心帖括與二三少年馳騁場屋
獵取聲華長老先生每見余所爲則羣起而嗔責
之謂之怪誕比年念高堂垂老乃始搨摺章句謂

可希世干進然廢日趨時而學終無補於古人充棟之書又十未見其一二然後悔此事之誤人而春華秋實之兼隕而落也因遂盡棄其口誦手抄之文復肆力於長老先生前所嗔責怪誕之事又以學識未堅探索未廣漫然行文僅取佶屈聱牙艱澀險僻者以爲差異今文不知其大悖於古文也遠矣近益爽然失怙然思取五經晝夜讀之更取孟子左國遷固史記晝夜讀之又取唐宋韓歐兩子晝夜讀之方知聖賢文章未有言不見道而

能傳於千百萬世者也僕今且未敢言文而先學道道苟一日有成高可以辨古今治忽善敗人品邪正真僞如數曆書黑凶白吉黃平碧毒分照天下也即次亦可與少年馳騁場屋獵取聲譽不至如時文輕脫滑利故多其轉折空其字句令人見之亦喜然去之竟不思也僕向往來江淮交遊不乏邇以教授生徒刺蹙尋丈之地盤旋坐臥顧影兀兀又不獲勝已之朋進德之友相與切劘淬勵俾得蚤聞道也可勝歎哉可勝嘆哉僕生二十七

年忽忽悠悠汨沒殆盡往者既往來者將來新者未新故者仍故計人生壽考之年以六十爲準如僕輩鉤深致遠勞形敝神又當少活十年此五十年中已過強半其間進退甘苦行止順逆天時豐歉人事夷險境遇離合情慾悲歡大抵不過如此其後二十年中亦不過如此即推之百年寧復有異誠知生人之趣有盡而見道之日難遲也僕聞足下學道頗力因求所謂勝已而進德者舍足下其誰與乎僕知足下善事老母足不出里閭有歲

時伏臘之樂僕兩親皆白髮待養於僕之一身又以山川阻隔非可朝發暮至每見風俗除夜雖傭販牧豎皆知買魚沽酒宰雞割豚肩羅列五辛跪拜膝下稱觴頌具慶僕士人已蹉跎承歡者六七年而今年又復蹉跎興言及此便已摧心傷骨若受鋒刃此誠仁人所共憫惜也今足下只盈盈一水相見無期僕擬買棹錢塘與足下傾倒數日夜徧歷窮崖絕谷飲醇過日勿復談文章得失湖山有靈其并持此書訂之

寄林鐵崖先生書

每從放庵家兄處讀先生往來手札深到婉摯如
託肺腑舍姪輩叨侍几席奉教誨有通家之誼某
獨不得從先生遊為可怪也某道經西陵者數數
矣食穀於人動止拘攣身無童僕道路茫昧出不
知所之行不知所底雖生嚮往輒復坐廢某自結
髮讀書以家道中落奔走饑寒學殖荒落無有一
是近因老親垂暮竭力不遑私欲退處井閭業於
醫卜一終反哺之願但諸弟孱弱耕讀兩失若某

一人朝夕自奉甘旨不如督諸弟成立各能揚名
親心懽悅尤甚於養以此怵迫東西手口交瘁乃
直道事人動輒得咎能容於大江南北而不能伸
於咫尺之地爲當代賢士大夫所體貌而受讒邪
小人之間沮吾道多窮可勝嘆息自夏徂秋悲傷
感憤竊慕古人窮愁著書之旨因撰西京雜語三
十篇就正有道以病中書嬾左右又無書之者求
教之心逾勃勃今先檢舊文二十首呈覽幸賜批
抹倘狂夫之言不悖於道然後敢徐出其有以辱
斧斲否則養羞藏拙而已昔李翱之作不經昌黎
指授則不能傳蘇軾之文既得歐陽知己因而大
著某之望於先生者豈其微乎豈其微乎

羅舍人入直西清序

癸卯冬余從友人入燕舍館之次日聞舍人文戰不利留長安未去急往訪之塵沙蔽天寒風砭骨夾雜牛馬間鞦韆殷殷心目惶惑薄暮始叩舍人扉見其敝帷破篋几榻蕭條僕多饑色是時舍人他出余詢其僕曰爾主人何至是乎此地多貴人長者豈不能惟朝夕是謀乎僕曰主人素自愛每朝懷一刺出門至暮無所投竟返以是潦倒羈棲罕有知者主人亦不求知也余曰夫既不求知矣

盍歸爾田廬乎僕曰主人慷慨離家與主母決誓
詞謂當肘懸金印紆朱拖紫拜父母堂上已而拊
小主人之頂嗚咽不能聲遂振衣而出挾空囊襍
被孤身寄五千里外今雖下第尚喜 朝廷多途
用人儻苟且就一官邀升斗祿免嗤於鄉里小兒
亦平夙心君何輕言歸也余愀然曰今人作別妻
孥歸先計期行先計日擇吉治裝灑酒祖道戀戀
不捨短氣於房幃之中爾主人抑何壯也越一日
得晤舍人舍人沽酒燕市酣嬉淋漓然後別去越

數日再晤余將放舟南下問舍人何所屬舍人無
言但曰東望會稽煙樹蒼蒼雲山漠漠爲我殷勤
致之甲辰歲秋舍人遂得官余乙巳春復至都門
以酒賀之曰子可以上報父母下慰妻子矣舍人
於是具述其由而繼之感泣余知舍人向非忘情
於家也蓋有大不得已焉舍人尊公作宦淮南士
悅民懷久於其職中罹禍變坐逮吏議比法曹白
其寃而已狼狽不遑矣攜家東歸僅敝廬數椽瘠
田數畝家人耕種力作以爲饘粥教子弟讀書益

勤舍人慨然興起曰余少年矜氣節慕交游破費
兩大人資產長爲農夫以沒世大人何賴有子哉
以故發憤而至於此也今舍人出入金馬門左右
宰相給天子筆札戴星而趨日沒而退食凡禁密
之地大臣議事之堂中外不得與聞者舍人先習
聞之以視偏州下里曲士小儒誦通都大邑條教
號令則轉相告語父老以稱道新政者其相去不
既天壤哉又見進士初作吏者類起家縣令始仕
刑官幾經遷次猶不得望承明之門躋清華之選

舍人可用是自壯矣而猶以出身太學爲憾母乃
過歟余與舍人垂髫同學始讀書公路浦舍人年
十四已補弟子員余年十五尚寄籬下舍人學舞
劍興發時染翰濡墨狼籍几案余好吟唐漢人詩
歌樂府及宋元詩餘小說暇則彈碁射覆以成嬉
樂繼而讀書倉塘萬山之中雞犬聞寂水鄉屈折
魚稻肥美余常濯足溪流擢歌橫發舍人入長林
豐草張弓射雉兔鳥獸駭然驚大笑而返夜歸讀
書童子淪茗剝笋動至達旦自是余列席吳中隔

兩載復往會舍人於山陽讀書鏡林署中舍人折
節好學醞釀老成爲文弘通典贍期於自然中節
而止舍人素以兄禮事余余得以猶子常拜兄母
夫人母夫人曰爾小子幼年結納願始終不渝窮
達一致有如古管鮑交因各受命唯唯余今遠不
逮舍人矣舍人致身青雲歲食朝廷廩祿給錢若
千榮顯二人光寵閭里內擢則爲部郎外授則爲
郡佐人生讀書之願至此稍償其半又况 聖朝
用人超軼前代於西掖近侍之臣尤加優異凡有

殊才皆勅禮部應春秋兩闈貢舉登進士高第猗
歟羅子雖致用未弘而荷榮斯赫矣獨恨鹿鹿如
余者四方餬口舌耕之苦病於夏畦所入不足以
養親所得不足以置產時人非之笑之以爲鬚眉
長大無資身之策有內顧之憂缺室家之歡絕風
雲之望舍人則曰子時不利也非才不售也然則
人生知己寧多得乎哉故於其入直也作文以序
之

祭海神廟文
 康熙六年丁未秋九月淮海道某謹以牲醴庶羞
 之儀黎園曲部之樂致祭於河神之靈曰維神司
 幽維官司明幽明雖殊而治河之職掌則均也神
 自赫聲濯靈以來率土之濱靡不儼若而淮為四
 瀆之一神尤萃聚故俎豆者更衆浦人祀神匪朝
 伊夕一旦榱桷不修茅茨莫翦神即未嘗過問其
 如下民失瞻仰何某備員淮海禮當禋祀廟靈未
 妥某之罪也爰庀厥工以葺斯宇旦晚告成神聿

祭海神廟文

代

康熙六年丁未秋九月淮海道某謹以牲醴庶羞
 之儀黎園曲部之樂致祭於河神之靈曰維神司
 幽維官司明幽明雖殊而治河之職掌則均也神
 自赫聲濯靈以來率土之濱靡不儼若而淮為四
 瀆之一神尤萃聚故俎豆者更衆浦人祀神匪朝
 伊夕一旦榱桷不修茅茨莫翦神即未嘗過問其
 如下民失瞻仰何某備員淮海禮當禋祀廟靈未
 妥某之罪也爰庀厥工以葺斯宇旦晚告成神聿

抱朴子房集卷五
寧止是未妥之靈既將飾廟以妥之在監司可告
無罪於神矣至於神之所攝者河若令水失源流
堤仍崩決吏遭嚴譴民困力作此獨非神之過乎
伏祈威奪黃河恩全赤子俾旁流復歸正道突堤
蚤賜成工庶神人交得相安而馨香彌見悠久也
否則以數十萬之窮夫當十一二月之霜候胠胙
卒瘡皸瘃狼籍臥凍吞饑迎風立仆神忍乎不忍
及今惟有急挽逆流速奏安瀾保全萬死之災黎
默護千年之疆土使本道無曠其職業爾神亦自

愛其功名毋忽尚饗

辨禽言者說

金華衆山中產幽禽好鳥弄新音怡悅人耳好事者致之盛以雕籠飼以香稻肉食晝貯清水濯之懸洞房邃閣外以爲嘒嘒可聽如笙簧之迭奏絲竹之競響也客有辨禽言者過而聆焉心駭其聲語主者曰此非愁苦無聊羈棲怨嘆之聲乎不然何其哀鳴宛轉而頓失山林之常度也主者曰有是哉子誤也客曰余往者山行見灌木之上豐草之內青溪曲澗之旁有若禽者載頡而上載頡而

下或飲或啄且鳴且飛其聲曠逸而清遠疏越而
嘹亮幽閑而和平今反是是桎梏之也盍捨諸主
者曰噫是何言也余朝擁衾牀上聽其音則欲起
食不甘旨聽其音則忘饑暮倦而思休聽其音則
節勞而釋困果其桎梏之而哀鳴宛轉耶則余何
爲而樂也余固不忍捨也客曰不然天下有在已
爲樂在物爲苦者有忘物之苦恣已之樂以爲物
亦樂者夫人亦然豈獨禽鳥云爾哉

蛇鬼辨

人情之所惡者莫如蛇鬼以其醜而惡之乎以其
傷害人而惡之乎二者兼有之金華郡南城有廢
署地頗廣相傳爲宋白公堂荒穢不治叢茨蔓長
鬼墟其宅蛇藪其圃人入於中者輒死不死者出
云鬼衣冠壯偉乘黑蹇驢陰悍剽賊擲泥弄土塞
室生人孔竅以爲嬉樂有蛇昂首引吭縱尾出樹
下蜿蜒丈餘目光鑠電躡踊而來如欲搏噬人狀
長吏聞而驚戒守者扃鑰非乘傳百人毋縱入余

以偏居暑病擇地而逃攜弟子及童僕三四人就
自公堂後灑掃寢處薙螺羸除蠨蛸內懸繩牀外
置石鼎鳥行於堦蟬唱於樹焚香讀書晏如也倦
或登危樓陟荒臺經頽廊弔蕪苑選石而坐清風
之來灑濯其心夜則螢火紛如蟲音喧寂幽夢逾
清旅懷不溷迺知向者相傳之謬也抑又思之彼
其有託而言歟鬼之為物陰也蛇亦陰類陽道不
勝遂結而凝陰陰氣太銳復犯而乘陽此君子道
消小人道長之象也不然鬼之毒吾人甚矣蛇又

濟之以虐人其尚有噍類乎

溫寶忠公忠烈傳

溫公諱璜字寶忠始名以介浙之烏程人世居戚里塘太夫人陸氏以苦節自幼撫之就塾師讀書塾東舍兒性頑黠見公據案飲食輒攘臂睨視曰吾家案也公唯唯移匕箸退就坐兒又嗔曰吾家坐也公唯唯就階除食訖無愠色歸亦不語母曰吾故家貧摧折乃其常耳告則恐傷親心也鄉里諸兒咸以醇謹就公公赴縣應童子試謁陳氏外家衣履垢敝僕輕之呼曰孰者爾主公整襟闊步

洋洋入就坐上外家萌悔心公恬不爲意舉止當
禮氣宇壯邁後縣試置第一外家私喜曰窮兒能
文幾坐失佳壻矣是歲補弟子員窶落不能婚太
夫人窮殫晝夜爲絰績積錢完室家事公亦出就
館穀歸持束脩悉奉太夫人前年五十二積學不
倦舉崇禎丙子鄉試是年即丁太夫人憂哀毀盡
禮服闋例應赴禮部試時族兄體仁爲相國秉政
朝士嫉之公慨然曰吾清白人何苦坐權要累進
身而犯衆忌耶避跡不應春官益下帷燈火沉酣

於先正制舉業族人有因田屋爭累歲不決各持
券契赴公求直公裂券碎契投於地曰叔姪至親
不思引分就誼乃效市井較量錙銖寧不爲祖宗
罪人哉族人慚愧而退公爲孝廉七載相國致政
歸始上公車至長安夢閱榜無以介名獨溫璜籍
貫與已同爲之咨嗟嘆息俄一老人拊背笑謂曰
溫璜即君也公醒而驚愕以爲神人指使不敢違
亟籲禮部題更今名遂獲捷崇禎癸未科以二甲
授推官得徽州偕繼配茅氏暨子女之任所公下

車平反訟獄得兩造情實不喜深刻暇時與都人士敦勵行義講求學業會甲申之變流寇薄京城懷宗皇帝俟皇后就經掩面手刃公主斷傷左臂次刃貴妃及所御者然後擲劍悲愴卒走煤山下自縊殉國難公聞報慟哭伏地曰臣不能從死地下忍苟活人間耶欲伏刃死之茅氏曰君父大仇未報徒死無益也願公稍延性命俯徇歛人之請因乃整頓疆宇防遏土寇逮清師掃蕩流氛下江南諸郡瓦解公乃退居淪坑曰君父之仇既報

吾今而後可以死矣從弟以中勸之歸公曰吾守土臣義當與此地爲存亡汝護持嫂氏挈姪輩還里門毋以余爲念也弟迫嫂氏就道嫂氏斂衽正色曰夫死異鄉婦歸故里於心忍乎夫願竭忠婦不引節於義安乎指天作誓願與公殉死一處弟窺兄嫂激烈勢難生還唏噓泣涕而別新安同官某某以功名求誘公峻詞拒絕旋手書一紙區分後事攜幼子託居停方養重徐闔戶服朝服北面再拜拔劍手刃茅氏次及長女葆德後廼自刎頸

抱犢山房集卷五
血淋漓濺地因連刃手怯破喉未死目炯炯不閉
某帥憐而救焉俾致醫藥勸飲食公擯不許進遂
以忠死於乙酉之九月二十九日年六十一耆民
汪正本方時照等具棺衾成禮而殮合殯公暨茅
氏淑人與長女葆德復祀公於二賢祠因公故更
祠名爲三賢迄今新安歲時奉祀不衰云公元配
陳氏生子旨召庠生夫婦先公早歿繼配茅氏生
子郊學於田間以承父志季名祈留新安亂定僕
人護之歸習舉業應試其弟以中遇余於吳江董

也
孝廉閻家含淚乞傳余因低徊忠烈之風不敢辭

抱犢山房集卷五

男曾筠謹編

附刻同難二先生詩文序

會稽王幼譽雲間沈天成兩先生在閩時與先君子同殉范忠貞公之難者先君子被繫獄中作百苦吟和淚譜兩先生互相酬答且成帙遺文炳然忠義凜烈昭昭乎若揭日月而行不可磨泯矣曾筠自束髮至今時時泣下以不得見先君子之全集爲憾幸有同難三山林能任先生當時以孀母年老諸戚黨爲營救出於難凡先君子所著述暨兩先生和章俱能任先生收藏無失曾筠至閩既

求得先君子前後詩文一一編次屬劄劄氏因更
閱兩先生百苦吟次韻幽光亮節如同聲同氣之
相應焉曾筠業抱無涯之戚莫可如何冀一表章
先君子殉節始末暨生平著述之萬一而使當日
同難執友俄焉隱沒必非先君子意因復掇兩先
生詩文若干另刻之次第合成六卷庶後人知一
時周旋患難所由竝俟良史昭賁無極區區感舊
之私亦少慰先君子云爾曾筠謹序

次和淚譜

王龍光

江左嵇先生名永仁字留山別號抱犢山農其世
系通顯具載家乘可考而知也先生少負才華奄
有聲稱居恒以救濟民生爲己任家於錫山居里
近東林講堂自名其廬曰東田邑侯吳公伯成顏
其額曰東田書屋嚴君中翰公與太傅范公周旋
京洛爲故舊交比見世多擾攘棲遲田里性恬淡
不事經營先生善養志凡父所欲爲與未及爲者
皆力爲之先生孝友性成而才足以相濟所由甘

百自裕而中翰公亦得優游林泉也先生少爲諸
生食餼有年噪聲名場中所爲文章往往爲人傳
誦輒取科第已獨屢挫場屋鬱鬱不得志以親老
昆弟未成室出就館穀當世知其具經濟才或聘
治河或諏荒政歷有成效爲廟堂所許可先生嫉
惡如仇多與小人齟齬而鬼蜮含沙害之者不少
先生固無恙也少曾受業於鞠存張公之門張公
居江淮所稱東溪先生者是也東溪教先生爲詩
歌古文詞手授漢書經史諸編學殖淹博著述日

富有葭秋堂詩竹林集留山堂初刻又好爲填詞
工北曲其遊戲三昧一種詞壇豔稱之若珊瑚鞭
布袋禪自以爲少年筆墨不稱意惟揚州夢頗自
謂略窺臨川堂奧櫟園周先生擊節其妙云與王
漢恭之想當然竝傳爲序以弁之且謂先生風度
彷彿樊川慷慨有大志而不拘小節者也先生惡
文法之徒叢脞政事出入輕重高下其手刻集政
備考一書便於仕宦給諫楊公自西序而行之先
生尤精於醫蓋其始祖家本中州石首公諱適爲

抱犢山房集附錄卷六
主簿於楚有惠政小民俎豆之祀名賢祠宋州公
諱穎以學士扈從南渡子姓散居吳越迄今雲川
之練市吳門之蓉莊皆有傳派先生乃蓉莊之宗
支也蓉莊祖瑩白玉蟾爲之卜地云後世當出名
醫以是子孫多習岐黃業先生到處負藥囊活人
疾病著東田醫補四卷江右李孝廉與偕珍於家
欲代爲梓行以傳世先生以數奇不偶將欲退耕
梁溪之野賣藥金閶之市隱而不出感范公知遇
從事於三山五嶺間束裝之日錫山邑侯吳公偕

諸名流置酒聽梧軒餞之各賦踏莎行一闋以憔悴
二字押韻中有孤城殘角夢家山亂帆影裏人
憔悴之句先生見而憂戚歸告中翰公曰此行恐
不利中翰公曰太傅舊誼何可忘促之行至署輒
病以此意達之公公堅留亦和前韻以廣其意有
停驂暫緩入山期哀鴻待爾離憔悴句先生勉留
焉至春仲先生賦詩曰不知何事春三月剛到清
明又憶還公解其意雖許之歸而未果也先生過
仙霞時謁關夫子廟盟於神前曰余此行惟以救

民爲務若萌利欲私心願奪我嗣天地鬼神實聞
斯語方逆藩潛蓄異圖先生知之每告公曰事勢
蹙迫宜早隄防與其爲忠臣毋寧爲良臣又曰神
龍見首不見尾屢以危言喻之蓋先生實爲牽情
慕義而至於此非昧於幾先者也不意遂及於難
豈非天哉被難之日先生握手謂余曰吾輩將從
公於地下矣余點首以答之先生神氣自若了無
怖懼以一二言懾服諸輩之心同就於繫逆雖脅
以刀鋸誘以爵祿毫不爲動在犴狴中先生猶存

心救世晦明寒暑筆未輟手續著東田醫補若干
卷求方索診者不一而足先生嘗嘆息曰死無餘
恨但醫統廢墮學其術而未大展活人之心耳又
著詩二卷一卷和蒙谷作一卷紀變又填雙報應
詞三十齣乃爲揭公重熙死難之事其亡友袁叅
嵐託其表章茲聞林翁談報應事云揭公已爲建
寧城隍先生感而爲之以報亡友其於患難中不
肯負人之託沒人之善如此又爲續離騷四種皆
寄友人收藏之其囑友人詩曰此身若遂沉淪死

留與寒家子弟看可喻其意矣嗟乎天豈以是限
先生哉先生年甫強壯蘊有經濟為世大用子二
人長曰曾筠次曰右丹皆弱稚未成人然英英已
露頭角天之所以報施先生政未有艾也獨是余
以暮年同淪難底朝夕飮聞先生之教敷陳大要
闡晰至理悲歌慷慨具由天性余之受裨益良非
淺鮮謹述大畧以見先生之節義文章並堪不朽
誠無負於公亦無負於天也

抱犢山房集附刻卷六

和百苦吟原韻

會稽王龍光

颶風

澤國秋高信海風年年飄忽吐龍宮風神若解憐
忠義吹盡寒灰歷劫中

瘴雨

淋瀝瘴雨勢傾盆涼氣無多熱氣存布被一牀霉
爛盡謾勞東閣報公孫

積潦

山城土竈滿蒿萊魚鼈經遊草樹堆莫嘆南天多
瘴癘江河日下盡堪哀

炎蒸

揮汗成漿三伏期陰房偏受熱風吹如爐長日從
銷鑠一片冰心覺自宜

凍雪

滕六天南說禍胎連年飄散浪疑猜信如今日多
爭戰骸骨成丘白作堆

連陰

白日經旬長自扃擡頭不放曉天青何時一破重
圍怨海國全消毒霧冥

梅濕

梅雨三山瘴霧天陰晴氣候苦相連爛衣一束供
高枕淚落殘更透破氈

泥濘

著屐東山座上紅游蹤今試雨泥中喜來屐齒何
妨折雙足強爲仁是公

昏黑

夜偏油火晝偏昏毒霧淒淒斷客魂生死由來同
夢覺自憐棲息遜雞豚

昧旦

中宵無寐枕空安輾轉單衾歸夢難唱徹雞聲天
欲曙曉星落落望更殘

瞭燈

明滅寒檠影半黃五更餘燄照頽牆獨嗟短夜無
歸夢拭盡啼痕天未光

屋漏

沉沉秋夜雨長懸濕盡衣單和淚穿暗室鑒臨形
影對儘教點滴到牀邊

濕地

賓主塵蒙驟斷魂滿腔悲憤土泥溫誰云正氣堪
埋滅徹夜雷霆天意存

負暄

當年就業水雲莊今作羈囚閩嶺長歷盡三冬寒
徹骨自教含淚向曦陽

早澡

杯盂貯水即爲盆塵垢麤除色便渾惟有成湯解
此意須教日日洗心魂

蓬首

老去空驚兩鬢絲蕭蕭對鏡漫披離婆娑猶足高
千丈長嘆中宵恨自知

垢面

消盡儀容老未還愁塵萬斛障顏顏憑教洗出來
時面笑破清光天地間

攣手

搦管揮戈事事工鞭雲指日笑談中直教握定擎
大手暫作旁觀兩袖籠

繫足

踏盡冰霜歷歲寒邯鄲學步路偏難名駒一息堪
千里束縛今同凡馬看

拘項

連環深鎖欲何憑引領青天骨自稜此法豈爲吾
輩設書生強項斷長繩

枯腸

筆硯拋殘已數年青
緡圖史委烽煙
寒儒雖在書
遭劫藉有同心叩腹便

淚眼

難裏相憐淚未乾
老來無淚但心酸
園扉一入同
盆覆常把青天仔細看

聞柝

關吏巡行夜聚牌
柳羅斷續亂長街
愁中但覺聲
淒絕總向風波惱客懷

聽砧

艱難何處寄征衣
未曉家山信是非
留得天涯秋
意苦數聲刀尺萬家機

隣哭

閩海心傷刀戟場
家啼巷哭盡離仁
填身溝壑埋
無土何用招魂向北叩

風鶴

道路驚傳鬪力微
依形竊響是還非
先聲草木皆
行陣螳臂應須早見機

砲警

萬火鳴雷聲徹天驚聞消息走狼煙海邦莫道無
防禦刮地煎砂已數年

感粟

腸斷寒宵角數聲天涯淒切倍關情此身不是防
邊客莫認羈囚當角兵

鼙鼓

路鼓喧闐動客悲妖聲相隔暮風吹他時若駕歸
舟急搖曳中流弄幾槌

笳吹

淒絕中宵客淚寒傷心笳管夢難安征人莫作回
頭望南北相思苦萬般

吏稽

難裏羞將面目呈福堂苦盡羽毛輕吏人不用多
稽察青史將來識姓名

卒穉

鬼物三年迭作羣畫圖水陸日紛紜他時若現輪
迴相只恐閻浮我是君

畫詰

紛紛邏卒守街衢老廢無聊泣向隅舊僕門邊供
菜食傷心淚眼看模糊

夜查

猙獰燃火到牀間叫應分明上鐵環吾輩不為無
義漢儘教狼籍鬼門關

值班

何事同舟趁逆帆往來相對鬼巉巖朝眠暮起多
拘束獸語禽聲口自喃

交更

蠻音攪耳夜齟嘈情面無從假半毫捱得愁中更
漏慣犬鳴雞唱笑徒勞

臭蟲

引類潛身浪蕩遊尋香逐臭雜相投已教吸盡人
膏血不放餘情到白頭

蠅蟲

捫蝨青山樂可圖談兵定霸亦相須當年壯畧推
王猛蠶食今知飽病夫

飛蠅

舊聞沉獄雪飛蠅今見蠅飛倍可憎莫道秋風吹
不到腥膻相逐逞何能

遊鼠

唧唧啼饑竄黠鼯齧鹽淡薄罄盤盂誰教白晝爭
人食搗穴難存社屋軀

聚蚊

湖傍秦郵草聚雷露筋曾拜廟容來難中莫說今
偏苦耳畔聲聲似訴哀

鬼啾

鬼作嚶啼夜氣森難中猶現宰官心蓮花法裏容
超劫不怕沉冤萬丈深

疫癘

災氣流行天意乖形如土木命如芟何當請出醫
王手莫學劉伶死後埋

碎衣

無分繁華原憲貧身僵半褐幾冬春形骸粗足供
顛沛莫問悠悠衣我人

破被

抄本房集附卷六
炎方一雨便秋來敗絮蒙茸暖氣回羨却五更清
夢裏還家更熱獸爐灰

砂鍋

鑽燧燃薪勉可爲晨昏饘粥壁煙炊泥砂亦有調
羹用委棄人前總莫知

泥爐

老來事事想安然搗土爲爐爇作煙被底不愁魂
未貼長宵抵足任高眠

瓦盆

泥缶聊存古朴風殘湯冷飯幾曾空有時擊得鳴
鳴響驚起同林磕睡翁

草褥

肌膚皺墨浪成痕藉草爲茵事可論冷暖不知人
老去飄零一似蔓無根

敝履

兩足龍鍾力不驕雙鳧家製著來遙多情東郭還
相愛送與先生踏灞橋

木枕

一枕羲皇不可安昏昏何日醒邯鄲夜眠莫作繁
華想於我浮雲世路難

篋筐

食物無餘饒菜羹紛紜雜貯未能清此筐聊且充
香積方便兒童荷擔輕

竹刀

寸鐵難持聲息嚴庖童刮竹製魚鹽叮嚀留與歸
途用當作牙檣驛路籤

草珠

維摩方丈昔藏修遠到三山苦滯留何用牟尼珠
百粒菩提方寸內堪求

油筆

燈煙土竈爛如星六月朝昏坐火亭聊藉清涼驅
溽氣蠅蚊一一手能經

惡紙

著書憂憤事難成欲寫窮愁愁更生何日雲煙供
一掃桑皮剪破兩三籬

臭墨

隃麋研透色青藍
膠味薰蒸油氣含
怕向故人酬白雪
煙煤紙上恐難甘

敗筆

羊毛一束價連城
信手聊成泣鬼兵
拈得新詩同史讀
也知直道腕中擎

磚硯

瓦胚作硯墨朦朧
煙霧和來泥土鎔
鐵石磨穿爲廢棄
悔教銅雀代耕農

殘書

竹笈藤箱走蠹魚
風塵千里爛圖書
縱教攫去成何用
覆甕無多灰燼餘

炭痕

灰蹤煇跡血絲垂
珠玉龍蛇和淚揮
親手投來同拜讀
雷風震疊數行詩

塵灰

三年怨恨積生塵
說與誰行整頓新
污垢寧教都掃盡
不將清白讓他人

煙眯

爨火如星旦暮燃難持怨氣達蒼天耳昏目炫等閒事惟待消除鋒鏑煙

乞水

貧來一勺不成烹坐向爐頭作嘆聲掬得半瓢猶德色文園到此更傷情

覓火

冒突衝煙海國城半天劫火怪秦坑何人爲設伊蒲供重熱爐灰煨蕨羹

摘菜

菜株別淨草連泥葉葉根根釀作齏爲想遺黎多此色焉能一一手中提

執爨

求人水火亦維艱墨喚千迴童子頑只當老僧棲破院煨茶啜粥自相關

食淡

年來氣味淡相尋苦菜酸齏亦費金連月併教鹽食斷嚼然何意作長吟

縫綻

抄本一房集附卷六
臨岐無母倍傷心針線全疎耐至今補得冬來春
又破可憐瘦體不遮襟

浣衣

薄澣艱辛訴向誰懷新去故力難辭洗來垢膩湯
如漆錯認烏盆似墨池

滌器

園扉滌器體無禪司馬情多繫木根留得盤罌滋
味好不教塵土咽饑魂

粉粥

老性安和粉作糧蔗霜調得熱充腸旁人笑問何
方物彷彿胡麻飯味香

餃飯

自笑飢軀汗漫行祇今枵腹向誰爭大烹無福堪
消受隔宿餘糧百味生

柳茶

垂垂綠樹即爲家未到清明摘嫩芽浪說盧仝堪
七椀武彞夢斷雨前茶

劣酒

結伴高陽興不無形骸桎梏酒腸枯故人買得常
分飲一陣酸風透瓦壺

缺藥

嘗來藥味總成虛真則無多贖有餘試向懸壺頻
盼望看看愁煞病相如

書傭

眼穿三載寸函書那有家鄉舊雁魚童子膝前來
問字寒暄寫就意躊躇

醫匠

破帽殘衫海上方此中真假費參詳惟君肘後多
仙訣冷落籬邊菊蕊黃

蔽蓆

寒風浙瀝打牀頭桑土聊爲蓬戶謀折就蘆簾遮
半蓆蝶魂栩栩夜無憂

籀桶

器物皆從破裏來竹皮木片有成胎一文不吝還
堪用始信人間無棄材

糞草

積污藏垢日成堆掃到何時掃得開自是亂中羅
網密獄無青草也無苔

穢廁

紫姑夜降掃須勤百畝農夫去惡氛但使生民無
穢濁何妨野老鼻風薰

溺器

不禮儒冠舊日情朝昏穢息徧牀楹牛溲馬渤非
無用醫道於今學漸成

惡夢

凶吉無憑事若何神思恍惚願蹉跎昨宵夢見風
波險只向高牆禱孟婆

元旦

抱悶窮冬望早春依然蒙難一孤身故園最足傷
情處此際庭梅花影新

清明

曉起愁聞杜宇聲傷心節候又清明誰知瘴嶺三
年別猶作他鄉患難人

至日

陽九艱逢網未開到今候轉一葭灰循環有序春
將至遙想家山夢幾回

除夕

牢落炎荒歲月窮鬚華狼藉任飄蓬弋人羅網聞
猶密誰作傳書塞上鴻

撫棺

死歸撒手便稱能生寄騰身悵未曾莫向鬼王誇
讀律不知何例脫寒冰

客俘

相逢爾汝盡南冠敲骨鞭皮總淚酸何事風波爭
入網翻身隨處可平安

老親

八旬窮父病牽衣愁子危方効力微囑道老軀猶
健飯三年可待順帆歸

昆弟

無兄無弟久離家棠棣關情悵落花子姪偷看堂
上健豈知懸淚望天涯

憶內

抄卷之六
絲絃未續舊時纜老病天南嘆獨夫同穴細君無
念我殷勤泉下奉慈姑

思兒

母亡父遠子孤零爾輩無成及壯齡讀我殘書無
散失待余甦難到家庭

同宗

永柏家聲清白嚴詩書聚族學深潛當時記得歸
家笑道我三年幕府廉

受業

髫時學古習韓蘇許我潛心出衆徒海國三年成
夢寐空勞老眼識迂儒

同社

名流帖括揣摩深願比他山感士林同學少年頭
白盡浪遊辜負下帷心

故恩

圖維報德老成翁落拓天涯患難躬歲月拋殘無
壯志獨留方寸感無窮

舊遊

抱犢山房集附刻卷一
念舊金陵別會稽雨花臺畔曉風迷煙霞到處堪
遊賞莫向三山聽鳥啼

祭墩

枯木從來說有靈仰天貫索豈無星滿腔赤血行
將灑蒼爾椒卮一炷馨

告神

不怨青天呼應高神靈三尺頌臯陶知君直曲無
偏枉何不從公雪俊髦

抱犢山房集附刻

和百苦吟原韻

雲間沈上章

颶風

撼海摧山鼓烈風蚩尤似欲拔蛟宮分明天意同
人意好挽危檣黑浪中

瘴雨

朝來驟雨已傾盆城郭煙消幾戶存最是濕衣烘
未得老天寧不念王孫

積潦

連宵風雨長蒿萊陰霧迷離丹嶂埋禾黍漫漫愁
望裏千村煙冷亦堪哀

炎蒸

爲霖爲雨拂前期馬渤紅塵遍地吹心境清涼揮
汗少火雲如蓋總相宜

凍雪

凍裂肌膚煉玉胎炎方風景費疑猜雨晴寒濕渾
無定怪指兵荒是雪堆

連陰

海雲日日鎖幽扃不見三山草木青直待薰風來
解愠笑看皎月破沉冥

梅濕

鄉夢難成怫鬱天顏垣赤體夜牀連陰雲熱氣相
鎔結暗灑花斑漬舊壇

泥濘

望斷關山淚雨紅不堪蹂踐夏臺中騰身灑脫塵
埃去屐齒逍遙訪遠公

昏黑

暮笳悽咽正黃昏無語空憐杜宇魂鄉國不知身
尚在清明爲我買雞豚

味旦

婦子晨興憶問安貧家菽水定艱難鳴雞聲裏空
流淚剩有絲絲鬢髮殘

瞭燈

高懸燈火照昏黃瘦骨稜稜倚短牆一枕覺來空
憶舊紗窗辜負日頭光

屋漏

官來點點似珠懸濕透鶉衣帶淚穿海國只今多
旱槁如何不灑麥苗邊

濕地

子夜誰能貼夢魂如冰似雪臥難溫餘生糞土尋
常事贏得伶仃傲骨存

負暄

步蒼忍凍憶山莊空有春風道路長冰雪久埋憔悴
甚倒扶藜杖試初陽

早澡

簷溜盛將水半盆
前除塵垢不嫌渾
泥塗自喜肝腸潔
夜夜清泉濯夢魂

蓬首

拂面拖肩鬢已絲
短長梳就復支離
愁來尚憶同心綰
兒女閨中只自知

垢面

癯貌何由得大還
丹砂未轉且鳩顏
憑他冷暖隨時去
面目重光談笑間

攣手

握槩爭如草檄工
持籌未展笑談中
當場欲吐賓王志
袖手偏將雙腕籠

繫足

立雪棲冰頗耐寒
家山何處夢艱難
平生未着王喬鳥
徽纒何勞着緊看

拘項

榮辱皆忘義足憑
錚錚強項不模稜
艱危百折冰心在
留與兒曹作準繩

枯腸

半豹徒窺壯盛年
肝腸如雪氣如煙
苦吟只爲消愁病
敢擬邊君話腹便

淚眼

滴滿春江淚已乾
每逢時序倍心酸
陰房未得瞻天日
昨夜家山夢裏看

聞柝

刁斗虛張挨號牌
兒童徭役也巡街
亂敲鈴柝無倫次
慣擾思歸夢裏懷

聽砧

誰家夜夜搗征衣
夢裏家山醒又非
寄語沈郎憔悴甚
腰圍莫織舊時機

鄰哭

赤子何辜暴戰場
驅他鋒鏑昧存亡
可憐少婦嗚鳴泣
空自招魂向北邙

風鶴

寄托乾坤一葉微
乘風破浪事全非
驚魂已作傷弓鳥
悟透人間禍福機

砲警

轟雷新試火連天不斷傳烽徧地煙誇盡戰爭雄
海國野人還憶舊豐年

感粟

曉風吹徹枕邊聲動我家山牧笛情滿地干戈愁
望裏問天何日得銷兵

鞞鼓

誰辨宮商音律悲夔夔聲響競鐃吹正平若使生
今日節奏鏗鏘搥幾槌

笳吹

一聲吹徧海天寒南北征夫豈兩般浪說封侯懸
印易萬金難買信平安

吏稽

獄吏尊嚴較簿呈此身萍寄羽毛輕吾曹氣節殊
周勃著甚施威高唱名

卒寧

小醜么麼結作羣揶揄惡態故紛紜懸空雖少軒
轅鏡劫火場中半是君

畫詰

網羅麟鳳逼街衢
鬼窟南方說海隅
草木皆兵防
範密晴天好日也模糊

夜查

恩仇細數笑談間
銜結都忘草共環
惟有夜來查
鎖鑰彼呼此應頗相關

值班

天南日日盼飛帆
未得長風困石巖
黑浪顛波顛
簸慣去來鷗鷺枉喃喃

交更

擊柝巡風徹夜嘈
輪番交代按纖毫
夢中我自還
家樂蠢爾蜉蝣何太勞

臭蟲

時候昏黃結隊遊
瞶人醉夢暗相投
覺來抹煞還
餘臭笑爾橫行著佛頭

蟣蟲

景畧曾中具壯圖
笑談當世偶相須
傲他混濁同
魚目捫搏誰能識丈夫

飛蠅

尋頭撲面笑飛蠅欲玷連城不自憎
逐臭營營惟附熱天涯冷處失君能

遊鼠

啼殘丙夜集饑鼯啣盡黃齏覆粥盂
祇顧貪饕供一嚼跳梁驚夢上人軀

聚蚊

結聚成團聲若雷幾回撲散又飛來
芳名千載稱筋露蒙難書生未足哀

鬼啾

沉沉殘柝夜蕭森似訴如悲動我心
三載為隣頻喚與慈航度爾黑波深

疫癘

調燮非關天意乖福基禍兆有根
芟明知瘴雨蠻煙地多難多愁志未埋

碎衣

捉襟露肘道非貧憔悴支離已兩春
為憶機中蔘芾婦裁成白袷待歸人

破被

苦雨淒風捲地來摧殘弱質氣難回老翁贈我黃
花絮一綫微陽撥凍灰

砂鍋

豆粥齏鹽何計爲壁間土缶起寒炊家居最慕調
羹事難裏聞韶味不知

泥爐

鎔成造化火初然泥竅中含數縷煙一枕乍回猶
未冷五更霜重不成眠

瓦盆

朴陋堪追太古風滿盛藜藿不愁空行將攜此江
南去老作田間鼓缶翁

草褥

髀肉磨穿破薦痕攣綸翡翠那堪論臥薪待畢前
生業石上三生話宿根

敝履

天涯空憶馬蹄驕芳草遲遲歸路遙不逐世情輕
敝屣好留穩步廣陵橋

木枕

圓木牀頭臥不安空煩授枕說邯鄲此中若有光明隙倚傍仙家去不難

篋筐

首宿盤飧只菜羹愁中滋味亦香清最嫌鼠輩空勞攘筐筥如城莫視輕

竹刀

禁網繁苛獄吏嚴竹刀切菜食無鹽割雞製錦何曾試信手如抽鄴架籤

草珠

恐慚衾影昧身修廿載禁持過少留不是餘生重佞佛恰如瞻母望中求

油簔

赤帝初懸大火星臨風避暑想荷亭元規塵在誰爲障手撲粗紈也慣經

惡紙

紆籌脫稿惜無成欲寄牢騷慰此生十萬錦箋書不盡殺青塗徧已三簔

臭墨

金精玉髓結深藍
吞吐虹霓彩氣含
猶是當年磨鐵手
如何此墨寸心甘

敗筆

偏師攻破五言城
淪落羞誇筆陣兵
定遠當年非浪擲
也因穎禿不堪擎

磚硯

案頭銅雀想朦朧
滴露研珠墨氣鎔
拋向亂軍何處覓
於今瓦礫伴耕農

殘書

卷軸芸香辟蠹魚
半生鄭重幾行書
亂來手澤輕如土
拋盡青緇痛有餘

炭痕

彪炳丹心千古垂
纔看煤跡淚頻揮
此情天地真堪老
報國憂民一首詩

塵灰

罡風吹動屋梁塵
席地千回拂拭新
暫學面牆存故我
不教蒙垢笑旁人

煙眯

昧旦寒灰燼復燃不知門外日升天
迷離倦眼開
難看認作金爐裊篆煙

乞水

解渴思將蟹眼烹西鄰聞有轆轤聲
強爲顏笑從
人乞不負殷勤一勺情

覓火

閩南原係祝融城况復沈淪在火坑
夜雨炊煙消
歇盡向人覓取作調羹

摘菜

不摘旁枝但剔泥青黃造出兩般齏
三殮飽啖聊
充腹滋味深長莫漫提

執爨

煮菜烹茶豈憚艱三年習得面皮頑
問他冷暖旁
觀者痛癢飢寒竟不關

食淡

鑄山煮海計千尋商算全操鹽似金
淡味畧嘗天
地闊不留煩惱只行吟

縫綻

採線金針教子心素絲易染佩于今臨行多少牽
衣意補綴年來淚滿巾

浣衣

滌垢除污說與誰萬千艱瘁未嘗辭洗來顏色還
清白勝入蓮花不染池

滌器

窮途阮籍一竿禪笑傲安能免俗根我欲臨流濯
萬里幾時白水可招魂

粉粥

陳蔡當年病絕糧炎方今日亦空腸一甌漫抵回
生藥始信農家麥飯香

餛飩飯

餽酸腐米氣流行撒向庭階鳥不爭耐取飢腸應
有日大官留饌待書生

柳茶

千泉泚水足山家柏子初燃試紫芽我愧盧仝耽
此癖難途柳葉作新茶

劣酒

破囊羞澀一文無斷酒三年腸已枯昨夜老翁憐
我病沽來村釀未盈壺

缺藥

歡少愁多氣脈枯病來藥餌欠羸餘茂陵渴症年
年發說與文君總怒如

書傭

老兵出紙倩爲書欲寄平安雙鯉魚聞道近來烽
火急從旁搦管也踟躇

醫匠

醫國空懷海上方順時調氣易周詳甦民自有清
涼散能起瘡痍菜色黃

蔽蓆

甕牖繩樞尚白頭資身清蔭愧無謀三年遮得風
多少步障如斯暫免憂

籩桶

貯水煎茶買得來需他完節合胚胎補鍋籩桶皆
遺老藉手周旋有用才

糞草

暮暮朝朝積幾堆
箒篁縛帚掃難開
漫誇一篲能
千仞肯使污泥覆
綠苔

穢廁

呼童蕩滌莫辭勤
穢氣能招疫癘氛
幾載浮沈同
混濁仗誰三沐復
三薰

溲器

患難淪胥見世情
裸裎氣味逼房楹
向人穢褻曾
無忌蝨處禪中慢
老成

惡夢

鄉國迷漫可奈何
黃梁幻境日蹉跎
至人清淨雖
無夢指點盧生心
亦婆

元旦

嬌鳥初啼報早春
南冠羈客未騰身
凌晨覽鏡餘
清淚惟有寒霜白
髮新

清明

風送啼鶉不斷聲
忍看春仲值清明
何時返里依
宗祖聊作東郊掃
墓人

至日

愁懷萬斛鬱難開誰向人間問劫灰白日今朝添
線影履長全擬一陽回

除夕

千磨百折五般窮瘴海沉淪類轉蓬此夜悲涼家
萬里夢魂何處返飛鴻

撫棺

哭君共事怪君能報德酬知惜未曾只恐夜臺猶
故態悠悠泉路總寒冰

客俘

道路時時是楚冠流離老幼鼻為酸山僧未免充
俘數似我長羈分所安

老親

慈母親縫遊子衣臨岐囑付見幾微倚門淚眼糝
糊望鱸膾尊羹何日歸

昆弟

善養高堂學作家閒時培灌紫荊花更須敬嫂還
憐姪切莫輕提海水涯

憶內

菽水艱難藉辟纊不須裁剪寄征夫買書勤與兒
曹讀教子承顏善事姑

思兒

想到依依淚暗零汝冠諸弟尚髫齡一經莫把韶
華誤侍祖強於趨父庭

同宗

友愛同遵祖訓嚴留餘堂內戒心潛英姿入夢心
猶痛彭澤歸來裝自廉

受業

千秋知己說歐蘇愧我才非金馬徒風雨雞鳴情
至重傷心隔世嘆先儒

同社

意氣相期河海深九峰初地結文林驪歌共灑臨
岐淚敢負垂髻金石心

感恩

鬚髮婆娑念老翁殷勤勉勵佩微躬分資餉母敦
明發報答瓊瑶奈困窮

舊遊

抄本... 卷之六

三

沈稿

朝看暮守豈無靈也識胸羅斗與星雀角鼠牙收
拾去臨歧為爾薦香馨

祭墩


氣未飛揚足未高顛危心事付臯陶餘生自分酬
知己一任張羅困俊髦

有慶覆審

曾筠謹編

抱牘山房集附刻卷六終

讚重校



This book should be returned to the Library on or before the last date stamped below.

A fine of ten cents a day is incurred by retaining it beyond the specified time.

Please return promptly.

